

12 AUG 1996  
Myanmar-Tiba  
PEMIMPIN MYANMAR TIBA UNTUK LAWATAN LIMA HARI

KUALA LUMPUR, 12 Ogos (Bernama) -- Pengerusi Majlis Pemulihan Undang-undang dan Pemerintahan Negara Kesatuan Myanmar (SLORC), Jen Than Shwe dan isterinya Puan Daw Kyaing Kyaing tiba di Lapangan Terbang Antarabangsa Sultan Abdul Aziz Shah di Subang hari ini untuk memulakan lawatan lima hari.

Mereka disambut oleh Menteri Luar Datuk Abdullah Haji Ahmad Badawi dan isteri Datin Endon Mahmood. Yang turut hadir ialah Menteri Pertahanan Datuk Syed Hamid Albar yang juga Menteri Pengiring.

Jen Than Shwe kemudian berlepas ke Medan Parlimen untuk upacara sambutan rasmi.

Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohd Ali kemudian membuat kunjungan hormat terhadap pemimpin Myanmar dan isterinya di Hotel Istana.

Jen Than Shwe dijadual mengadakan perbincangan dengan Dr Mahathir di Jabatan Perdana Menteri pada tengah hari dan menyaksikan penandatanganan beberapa perjanjian.

Malam ini, Jen Than Shwe dan isterinya dijadual menghadap Yang di-Pertuan Agong Tuanku Ja'afar dan Raja Permaisuri Agong Tuanku Najihah di Istana Negara dan menghadiri jamuan negara.

Pemimpin Myanmar itu dijadual melawat Lapangan Terbang Antarabangsa Kuala Lumpur di Sepang dan kilang Proton di Shah Alam, dan menghadiri taklimat di Unit Perancang Ekonomi.

Isterinya akan mempunyai program berasingan, dan antara lain melawat Muzium Negara dan Pasar Budaya.

Jen Than Shwe dan isterinya akan berlepas ke Pulau Pinang pada hari Rabu dan dijadual mengunjungi Yang Dipertua Negeri Tun Hamdan Sheikh Tahir dan isteri Toh Puan Hajah Siti Zainab.

Beliau dijadual melawat kilang Sony Electronics (M) Sdn Bhd di Taman Perindustrian Prai dan sebuah tokong Buddha, dan menghadiri taklimat di Perbadanan Pembangunan Pulau Pinang dan Penang Port Sdn Bhd.

Jen Than Shwe dan isterinya akan berlepas pulang ke Myanmar dari Lapangan Terbang Antarabangsa Bayan Lepas pada hari Jumaat.

-- BERNAMA

AKT AKD